



# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA IUNI 2018

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## O le Agaga o le Atamai i Gagana

*saunia e*

### Manu Asafo Maugatai TT

EFKS Manunu, Apia Sasae  
mo le Fono Tele 2018

Ua lua nei vaiaso o laugaina lava e le Aufaigaluega le manulauti o le Fono Tele: 'O le Agaga o le Atamai i Gagana.' E manatu ua matua'i malamalama ma manino lenei Fono Tele i felavasa'iga ma *faaauau itulau e 2*

### Se aso pe a oo ina ou Matua

*O se tala mo Tupulaga  
Talavou - ma Matua  
silasila itulau e 10*



**Faauga o Faifeau:** Susuga Etiveni Taavao ma le faletua ia Siileviiga, o uo ma aiga ina ua mae'a le faauga i le Fale lupeli i Malua.



Rev. Faresa Faresa ma le faletua ia Mae, faifeau fou o Sataoa, Safata

## Osiga Feagaiga a Sataoa ma lo latou Faifeau o Faresa Faresa

Tumu! Matua tumu lava! O le mea faia'iga lava le tele o lo matou malae, ua mafai ai ona ofi uma taavale na malaga atu ai le mamalu i le Ekalesia, o

aiga ma uo i lea aso fiafia. O se vaaiga uiga ese le toatele o tagata na auai i lea aso. Fa'i o le pa'ia i aiga na lua o le Tala

*faaauau itulau e 8*

# O le Agaga o le Atamai i Gagana

*mai le itulau muamua*

le uiga loloto o lenei anava tau.

Ae manatua pea i le loto faamaumauga o le Fono Faavae a lo tatou atunuu i le 1960. Na faapea foi ona laugaina e se tasi o ta'ita'i i le faamanatuina o le 51 tausaga o lo tatou Tutoatasi, na faapea ona faamalamalamaina ai uiga o lanu e tolu o loo faaogaina i le Tagavai (Fu'a) a lo tatou atunuu. O le lanumoana, lanu mumu, ma le lanu pa'epa'e.

Lanumoana - le moana lea na auvasa mai ai tua'a ma matua ma to'ai taunuu i le atumotu o Samoa, ma ua faatagataina ai le motu pe a ma le 3000 tauaga ua mavae. O le moana lea o loo faalagi ai nei o le vasa poo le 'va 'e sa'. O le moana lea e iloa gofie ai le tagata mataalia, ona e iloa tau le tai, e iloa foi faitau fetu folau. O le moana lea e fesootai ai atunuu o le Pasefika i le gafa, i le mau tuufaasolo, i le tala faasolopito. O le lanu moana, o le molimau o le tuufaafegai o le vasa ma le lalolagi i le lanu moana. O lou tofi ma lo'u faasinomaga.

O le lanu mumu - e faasino lea i le faitauga i le toto masaa. E le ese le talafaasolopito o Eperu e pei ona fai mai le Tusi Paia, ma le talafaasolopito o Samoa, e fai taulaga tagata i le toto masaa ina ia malu puipuia le tofi ma le faasinomaga. E mafua ona faaosofia le lotonuu ona o le feau e momoli e le upu i le mafaufau.

O le lanu pa'epa'e o fetu o le satauro, o le fetu ta'iala, ua faa-Peretaniaina o le 'Southern Cross', e faasino i le sulu o le malamalama o le Tala Lelei, e molimauina e le fe'au o le faafouina ma le fe'au o le toe fuata'iina talu ai le galuega togiaola a lo tatou Faaola o Iesu Keriso.

O le a lou tofi? O le a lou

faasinomaga? O le tofi o le tagata Samoa o lona laueleele, o lana aganuu, ma le agaifanua, o lana gagana. O le feau tuumumusu mai e le mau tuufaasolo ma le tala faasolopito. O le tofi poo le faasinomaga o le tagata Kerisiano, o lona Atua, o lana Tapuaiga, ma lona Talitonuga, o la tatou Ekalesia EFKS.

Aisea ua tatou tumutumu mai ai i Malua i tausaga taitasi i Fono Usua le Ekalesia Aoa? E mafua ona o lo tatou Faasinomaga, e mafua ona o lo tatou Tofi.

Aisea ua faigofie ai ona tuua aiga, o taitoalua, o fanau, o galuega, o nuu mo le lua vaiaso? E mafua ona o lou soifua ofo, o lau faitaulaga, o lau tautua, o lau auaunaga ina ia malu puipuia lou tofi.

Aisea ua e fiafia ai i le ola mafuta i isi ou uso ma tapuaiga, aemaise le faasoa i mataupu faaleagaga? E mafua ona o lou naunau i le ola faafouina ma le soifua toe fuataiina.

O le 'auga la o le Agaga o le Atamai i Gagana, muamua, o le fe'au o le mau tuufaasolo ma le tala faasolopito poo lou tofi ma lou faasinomaga. Lua, o le feau o le faitaulaga, tautua ma le auaunaga. Tolu, o le feau o le faafouina ma le toe fuataiina. Aua o nei feau e momoli e le upu, le upu lea e fai mai le Tusi Paia, "**Sa i le amataga le Upu, sa i le Atua le Upu, o le Atua foi le Upu.**"

Ua mafai la ona toe faamatalaina le manulauti o lenei Fono Tele, '**O le Agaga o le Atamai i Gagana' - O le Agaga o le Atua e afua ai le atamai i gagana.** O lona uiga na iai lava le Agaga o le Atua e afua ai le atamai i gagana i o tatou tua'a na asa maia le gasu o le taeao.

E faaalua i le gagana le ituaiga tagata. Pe savali i lana gagana, pe

na ona fetalai ae le ola ai. Ua aumai e le Atua le Agaga o le Atamai i gagana i le tagata. O le Agaga e atamai ai e tautala ae sili ai ona atamai e ola ai i le gagana faale-Atua ua tino mai i le amio ma le ola faatuatua.

Faapefea ona tatou iloa ua iai le Agaga o le Atua e afua ai lea atamai i gagana?

**1. E aumai e le Atua le gagana e faaogaina mo le lelei o tagata.** Na tautino e Mose lona le iloa tautala ma le iloa failauga. Na tofia e le Atua Mose e na te taitai ese lona nuu mai le pologa. E le'i suia e se manatu o Mose le filifiliga a le Atua. Na fetalai le Atua, "O lenei alu ia oe, o a'u foi ou te faatasi ma lou gutu, ou te a'oa'o atu foi ia te oe i upu e te tautala atu ai ((Esoto 4:12-17). O le gagana e faamoemoe i le ta'ita'iga a le Atua e ala ia Mose ma Arona. Ua o gatusa ma le muagagana, o le fuata ma lona lou. O suiga fou ma faafitauli eseese e tutupu, e tutupu suiga fou, ma foia faafitauli, e le gagana ua ta'ita'i e le Atua.

**2. E faapaiaina e le Atua le gagana a le tagata mo ana feau.** Na filifilia e le Atua Isaia e avea ma ana perofeta mo lona nuu. O se faatinoga na tautino ai le le tusa o le perofeta i luma o le Atua. Na ia ta'utino lona laugutu leaga ma le laugutu leaga o tagata o lona nuu. Na faamamaina ona laugutu i le malala ola mai le fata faitaulaaga. "Na ia faapa'i mai i lo'u gutu ma faapea mai, faauta ua papa'i atu lenei mea i ou laugutu ua aveeseina ai lau amio leaga, ua faamagaloina foi lau agasala (Isaia 6:1-8).

silasila itulau e 5

# O LE LAUGA

## TUSI FAITAU :

1 NOFOAIGA TUPU 13  
FILIFI 2: 1-11

**MATUA :** 1 Nofoaiga Tupu 13 : f  
6-7

*“Ua o atu Tavita ma Isaraelu  
uma i Paala, o Kiriatia-Iarima lea,  
o le aai o Iuta, e aveina a’e ai nai  
lea mea o le atolaau a le Atua, o  
le Ali’i, o le afio i le va o kerupi, e  
ona le suafa ua valaauina i lea  
mea.”*

**Manatu Autu :** “Aua le faia o  
tatou loto, a’o le finagalo o le  
Atua.”

O le fa’aeaina o Tavita e avea ma  
tupu o Isaraelu, e manino o le  
finagalo lava o le Atua soifua. E i  
ai fo’i le talitonuga o se fa’aiuga  
na autasi uma i ai finagalo o tagata  
o le nu’u o le Atua, ina ua maluu  
fasia Saulo ma ona atali’i, i le taua  
ma Filisitua. O le talitonuga  
maualuga o tagata, o le oti o Saulo  
o le taua o lana agasala, ona o lona  
le ususita’i i le Ali’i. atoa ma lona  
saili e fesili i aitu vavalu, ae le saili  
i le Ali’i o le na tofia o ia e fai ma  
tupu, o lona nu’u. O le uiga lea o  
le tagata, na te le manatua le Atua,  
na valaauina ma tofia o ia e seei i  
fa’amanuiaga ua i ai, le manatua  
le Ali’i i ana fa’aiuga ma filifiliga  
fai, e le i’u lelei lona ola.

I le amataga o le galuega fa’atupu  
a Tavita, o le mea muamua lava  
na ia manatu ma mafaua i ai. Ia  
toe fa’afu’e ma aumai le mamalu  
o le Atua i lona nu’u, e ala i le  
aami o le atolaau mai Kiriatia-  
Iarima. E le gata i lona ae na te  
le’i fa’asili sona iloa ma sona  
atamai fa’ata’ita’i peita’i na ia  
aami ali’i ma ta’ita’i sili uma o le  
nu’u latou te soalaupule ma filifili  
fa’atasi. Fai atu a ia, “Afai e tatau  
ia te outou na, ma ua finagalo i ai  
le Ali’i lo tatou Atua, ia tatou  
feausoloina atu o tatou uso o totoe

i nu’u uma o Isaraelu, o le au  
faitaulaga ma sa Levi fa’atasi ma  
i latou i a latou tuafanua, ia  
fa’apotopoto mai ia te i tatou; ia  
tatou aumaia le atolaau a lo tatou  
Atua ia te i tatou; aua ua tatou le  
saili aii onapo o Saulo. O le mea  
moni, ua lelei tele lea i le mafaua  
fa’ale-tagata, peita’i o iinei o iloa  
ai le le mamafa fo’i ia Tavita o le  
la va feagai ai ma le Atua. Aua o  
lea ua saili i le finagalo o ta’ita’i o  
le nu’u, peita’i e le o iloa se taimi  
na ia saili ai i se finagalo o lona  
Atua. Avea le mamalu ma le  
fa’aeaina ua galo nimo ai le na  
maua mai ai fa’amanuiaga. Ma o  
le mafuaaga lea na a’afia ma  
tutupu ai nisi o fa’alavelave i le  
ala.

1. I le Tusi o Esoto 25: 12-  
16, o lo’o fetalai manino ai le Ali’i  
ia Mose e fau le atolaau pe a ma le  
faselau tausaga, ae lei o’o i taimi  
o Tavita, atoa ma ona fa’atonuga  
uma, e pei o lenei, o le atolaau pe  
a feavea’i mai lea nofoaga I lea  
nofoaga, e tatau ona amoina i  
tauau o le au ositaulaga. E na o  
tagata fo’i o le au sa Levi, le  
fanauga a Koata e latou te amoina,  
ae aua ne’i latou papa’i atu i se  
mea paia, ne’i latou oti (Numera  
4: 15). Peita’i, ina ua latou  
aveeseina mai le atolaau i Kiriatia-  
Iarima, e leai ma se fa’atonuga na  
finagalo ai le Ali’i ia Mose, na  
usitaia e Tavita ma tagata o le nu’u.  
Latou te le’i amoina, e pei ona  
fa’atonuina, peita’i ua fa’atietie  
mai le atolaau i le kariota  
fa’ata’avalevale fou na latou  
fauina. Ua avea suiga o le soifuaga  
ae maise o le vavamamao o taimi  
o Mose ma Tavita ma ala ua le  
fa’atauaina ai e Isaraelu ma lo  
latou ta’ita’i le mea tonu na  
finagalo ai le Atua. Na taumalua  
le kariota ma taupau ai le atolaau,  
o le ala lea o le papa’i atu i ai o  
Usa ina ia talitali mai le atolaau,

avea ma ala o lona malaia ai. Oti  
ona ua le usitai i mea na  
fa’atonuina mai e le Ali’i i le  
amataga. O le finagalo o le Atua,  
o Lana atolaau, o i ai lona mamalu  
ma lona Silisiliese e tatau ona  
fa’ao’o ma fa’ailoa atu i le lalolagi  
e ala i Lana au ositaulaga paia na  
la tofofi ma valaauina, ae le o ni  
mea na faia i se poto ma se iloa  
fa’ale-tagata, ni tekonoosi  
fa’aonapo nei, e faigofie o  
mafulifuli solo. O le iuga o le  
tagata na te faia ma le fa’ale-tatau  
le finagalo o le Atua, e i’u i le  
malaia ma le oti. E ui lava na tele  
aso ma tausaga na tausia ai e  
Apinatapa ma ona atali’i le atolaau  
i lo latou fale, e le avea lona ma  
ala e mafai ai ona latou so’ona faia  
ai ni suiga e le talafeagai ma le  
finagalo paia o le Atua.

2. O le oti o Usa e le o se mea  
na fa’afuase’i, ae o se aoaiga a le  
Ali’i ma se fa’amanatu taua e le  
gata mo Usa, ae mo Tavita fo’i ma  
le nu’u o Isaraelu, ma o tatou  
tagata uma lava, itaimi tatou te  
manatu mamaai i le fa’atinoina o  
tatou tiute ile auaunaga i le Atua.

(i) Na sese Usa i lona manatu  
e le taua po’o ai e aveina le  
atolaau.

(ii) Na sese Usa i lona manatu  
e le taua po’o le a le ala e ave ai le  
atolaau, pau lava le mea ia ave.

(iii) Na sese Usa i lona manatu  
ua na iloa mea uma e uiga i le  
atolaau, aua ua leva ona latou  
tausia i lo latou aiga.

(iv) Na sese Usa i lona manatu  
ua le mafai e le Ali’i ona leoleo  
ma tausia Lana atolaau.

(v) O le uiga o le igoa Usa,  
“o le malos, (strength)” ua  
fa’amaualuga ai Usa e mafai ona  
ia ave, leoleo ma puipui le atolaau  
a le Atua i lona malos fa’ale-  
tagata, ae galo ai ia te ia e le faimea  
lona malos i le Mana ma le malos  
silisiliese o le Atua soifua.

3. I le malaia o Usa, na tiga  
ai Tavita ma ita i le Atua. Na ia  
fesili ifo i lona loto, Pe aisea ua le  
*faaauau itulau e 4*

# O LE LAUGA

*mai le itulau e 3*

fiafia ai le Ali'i le mea ua ia naunau ma taumafai i ai. Ae galo ia Tavita, o lo'o lelei lona naunautaiga e ave le atolaau i Ieruselema, peita'i o lo'o sese ma le talafeagai le ala o lo'o fa'atino ai, aua o lo'o iloa manino mai iinei, lona le usita'i, ma lona fo'i le fa'alogi o le finagalo o le Atua. Manatua fo'i, o ala o le Atua e le o tatou ala ia. O mea uma fo'i tatou manatu ua tonu ma lelei, ae afai e le o gatusa ma le finagalo paia o le Atua, e matua sese lava. A'o le mea e sili ona matu'ia, o le tagata e le saili ma fesili i le Atua, ae manatu e fai le mea ua ia loto i ai, e tele lava ina le i'u manuia. A manuia fo'i ae le umi ona lelei. Na fefe Tavita i le mea ua tupu ma ia fa'apea ai, "Pe fa'apefea ona ou aumaia le atolaau a le Atua ia te a'u.? O le mafuaaga lena na ia ave ai le atola'au ma tu'u i le fale o Opete-etoma ile tolu masina, ae o i'ina na fa'amanuia ai le Ali'i i le aiga o Opete-etoma atoa ma mea uma na faia e Opete-etoma. O le fa'afuase'i ona fa'amanuiaina e le Ali'i o Opete-etoma ma lona aiga, o le fa'amanatu lea a le Ali'i ia Tavita e tatau ona toe mafaufau, ma toe va'ava'ai lelei po'o fea tonu lea a lape ai lana auaunaga. Ua tatau ona ia iloa lona le usita'i ma lona le savali i fa'atonuga uma na tu'uina ifo ia Mose e uiga i le atolaau, o fa'atonuga fo'i ia e tatau ona ia usita'i i ai ma fai. O le "atolaau o le feagaiga" o le mea e paia, e tatau fo'i ona paia ia te ia ma le nu'u uma, aua o lo'o i ai le Paia ma le Mamalu o le Atua Soifua, ma e tatau ona iloa le mamalu lea o le Atua i lo latou ola i taimi uma.

Ua fa'amuamua ia Tavita fa'afiafiaga. Ua latou ta kitara, ma napeli ma topa, o sumepalo ma ili pu, ua latou sisiva, ma sa'asa'a ai

le tupu. Manatu lava i latou, o fiafia ai le finagalo o le Ali'i, peita'i e leai. Aua i le silafaga a le Atua, ua sisiva ma fiafia Tavita ma le nu'u, ua fai o latou lava vi'iga, fa'aseseina fa'apea ua mafai ona latou aveeseina le atolaau mai le nofoaga ua loa ona i ai. Leai ma se ta'ua o se agaga e fia fa'afetaia ma fa'amanuina le suafa mamalu o le Atua Soifua, o le na fa'amaiteina manatu ma mafaufauga lelei i lona loto. Ua na o viiga lava o le tagata ma mea ua na mafaia.

Ua mavae atu Saulo o le tupu muamua o Isaraelu na iloga lona le usita'i ma lona le fa'alogi i le Atua, o le ala lea na fofoeeseina ai fa'amanuiga mai ia te ia. Tuliese mai le mamalu na i ai ona na ia faia lona loto ae le o le finagalo o le Atua. Lea fo'i ua tula'i mai Tavita e ta'ita'i le nu'u, ua amata sese fo'i. Amata i le sese o ana fa'aiuga ma filifiliga e fai, ua filifili ma ta'ita'i fa'atagata o le lalolagi, lea ua sese ai le nu'u, afaina ai fo'i ma le ola o tagata i lalo o lana ta'ita'iga. Amata sese, aua ua na le manatua le Atua na valaauina o ia i le nofoali'i o lona nu'u. Lea ua ia fesili i tagata, o ta'ita'i o le nu'u i le mea na ia mana'o ai, ua manatu e su'e sona lanu ma taumafai e fa'amalie loto o tagata, ae le'i fesili muamua i le Atua. E lelei le tau lagalagai mea lelei mo se viiga o le Atua, ae afai e fa'amaite e le tagata ni mea fou i totonu, o lona aiga, o lona nu'u ae maise fo'ile malo ma le galuega paia a le Atua mo ni ona lava viiga, e ta'uleleia ma manuia ai o ia, o lona iuga, e le i'u manuia, aua e le o ala na e fiafia i ai le Atua. O ala fo'i ia o le tagata fa'amaualuga ma fia atua, e galo ia te ia ma na le manatua le agalelei ma le alofa tunoa o le Atua mo ia. E fa'aeaina loa i tofi ma

mamalu fa'ale-tagata, vaai maulalo loa, le amanaia ma le alofa loa i tagata vaivai ma le taualoa.

Manatu lava o se fa'amanatu taua tele mo le Ekalesia ae tainane fo'i Samoa si o tatou atunu'u, e afua mai ou ta'ita'i, o i tatou uma seia o'o lava i so'o se tasi o fa'atinoina lana auaunaga ma le tautua i le Atua soifua i so'o se ala. E taua tele lo tatou fa'atinoina o tatou tofi ma tiute i le moni ma le fa'amaoni e tatau ai. Fa'atino i le alofa ma le usita'i i le Ali'i le Atua o le na muai alofa mai ia te'i tatou. Ia o tatou fa'asili ma fa'amuamua pea o la ia tatou fa'aiuga ma filifiliga fai, e manuia ai so'o se mea tatou te manatu i ai. Aua ne'i faia i se potu, i se malosi ma se iloa fa'ale-tagata, aua e le i'u manuia ai ou faiva. Pe a fa'amaualugaina oe e le Atua i tofi ma tiute ua la finagalo ai mo tatou, ia manatua e fa'afai le vi'iga ma le fa'afetai ia te Ia ua onomea iai. Aua ne'i pei i tatou o Saulo ma Tavita na o'o loa i le mamalu o le nofoali'i, galo loa le Ali'i le Atua.

E le i toe manatu e usita'i ma fa'alogi ile Atua, e le'i toe fia saili fo'i pe fesili ise finagalo o le Ali'i, ua fai lava le mea ua iloa e le tagata ia. E le'i i'u lelei Saulo, ua outou silafia. Na afaina ma oti le tagata, a'o la lava e siva Tavita ma fiafia, ua mafai ona ia aveeseina mai le atolaau o le feagaiga mai le aiga o Apinatapa i le tele o tausaga na i ai. Ua ala ona fa'apena, ona ua logovi'i ma fa'amaualuga, galo ai le taua o le valaauina. O le mea taua, ia aua ne'i galo ia i tatou le Atua ma lona finagalo fa'asino mai i mea uma e manatu i ai. Ia lagona pea le loto maulalo, lagona lo tatou le atoatoa ma le fa'atauvaa i luma o Lana silafaga paia. E pei ona fa'amanatu e le aposetolo i le ekalesia i Filipi le galuega na feagai ma lo tatou Ali'i fa'aola, o Iesu Keriso. E ui lava o Ia o le *faaauau itula e 5*

# O le Agaga o le Atamai i Gagana

*mai le itulau e 2*

Ua faapena le faamoemoe pe a fai saofa'i a matai. E fai le sauniga lotu e faapaia ai e o le a faia nofo. E faapaia ma faamama ai i latou. E faia le upu i matai - Ua vaeluaina ia i latou le suafa o le Atua'. O lona uiga, ia gagana pe fetalai le matai i le gagana faale-Atua. Ia avea i latou ma ave feau a le Atua i le latou matafaioi faamatai. O le matafaioi ia manuia tagata uma ae le na o se vaega.

**3. E mafai/le mafai ona lavea'iina le tagata ma nisi i lana gagana.** O Raava o se fafine Ieriko. O ia foi o se fafine talitane. O lana gagana, na lavea'iina ai o ia ma lona aiga. Ua iloa i lana gagana lona talitonu i le mata'utia ma le silisiliese o mea e faia e le Atua o Isaraelu. Na ia faapea: "Na matou faalogo i i mea, ona liu suavai ai lea o matou lotu, ua le toe iai lava se malosi i se tagata, ona o outou, aua o le Alii lo outou

Atua o le Atua ia o le lagi i luga, ma le lalolagi i lalo nei (Iosua 2:11-14). Na lavea'iina Raava ma lona aiga ona o lana gagana. O le gagana ua afua mai le lotu ua talitonu i le galue mai o le Atua.

Na lavea'iina le tama a le fafine Eleni mai le nuu o Suria Foinie e Iesu. Ua tupu lea faamalologa a le Alii ona o le gagana a leni tina.. Ua iloa tino i lana gagana lona talitou ma lona faatuatua i le mana faaola o Iesu. Ua ia faapea, "Le Alii e, e moni a oe; ae ui i lea ua aai e uli o momoi mea ua pa'a'u i aulau a o latou taula." (Mataio 15:22-28).

Na le mafaia e tupe o le fanua o Anania ma Safaira ona lavea'iina i laua. Aua ua la faia se faiga pepelo. Ua gagana i upu ua ta'ita'i e le mana o faale-tagata. Ua gagana i upu pepelo ma le le tonu. ".....pe na ouua faatau atu ea le fanua i ia lava mea? Ua fai mai o ia, "Ioe o lea lava." Ona fai mai lea o Peteru ia te ia, "Se a le mea

ua oulua lotu gatasi e tofotofo i le Agaga Paia o le Alii? Faauta, o tutu mai i le faitotoa i latou e na tanu lau tane, latou te ave foi ia te oe i fafo." (Galuega 5:1-6). O le gagana ua ta'ita'i e le tu'inaanau o le 'oa ma le tamaoiga. Ua avea lea gagana ma i'uga o i la'ua uma.

**4. E faaaogaina e le Atua gagana e tusa ma lona finagalo.**

Na le lelei i le silasila a le Atua le faamoemoe na faia ai le 'olo i Papelu. Ua manino ai le fia iloa ma le fia ta'uta'ua o le tagata. Ua sese le mitamitaga. Ua naunau e nonofo i le nofoaga e tasi ae ua lautele le lalolagi. Ua faaeseeseina e le Atua a latou gagana a o faia le galuega o le 'olo. Ua le femalamalama'i ma ua tuua le galuega. Ua faataapeapeina e le Atua tagata. Ua o atu ma aina ai itu e tele o le lalolagi. "Ona faataapeapeina lea e le Alii ia te i latou ai lea mea i le lalolagi uma; ona tuua lea e i latou ona faia o le aai. O le mea lea ua igoa ai ia o Papelu, aua ua faaeseeseina i lea mea e le Alii o le gagana a le lalolagi uma; na faataapeape foi e le Alii ia te i latou ai lea mea i le lalolagi uma." (Kese 11:8).

Ua faapea foi i le tala i le Feagaiga Fou. Na auina mai e le Atua lona Agaga Paia i le Aso Penetekoso. Na iai i luga o le Au Aposetolo le Agaga Paia. Le Agaga Paia na afua ai ona tautatala ona soo i gagana eseese. O se meaalofa mai le Atua mo ana aposetolo. Ole Agaga o le Atamai i gagana ua afua ai ona mafai ona faia le galuega tala'i a ona soo. Ua faaaogaina e le Atua gagana eseese e tala'i ai le Tala Lelei o le Faaolataga mo le lalolagi. Ua le faapito Manu ia Tasi. Ae o le Tala

*faaauau itulau e 9*

---

## O LE LAUGA

*mai le itulau e 4*

tupu, o le Alo o le Atua soifua, ae le'i fa'amaua luga ai lona lotu. O la Paulo i le Ekalesia i Filipi, "Ia ia te outou fo'i leni manatu o ia Keriso Iesu; o le sa uiga fa'atasi ma le Atua, e le i manatu o Ia o se mea e u'u mau lona tulaga tutusa ma le Atua; a ua sasa'a atu o Ia e Ia lava, e fai mona le uiga o le pologa i Lona fanau mai fa'apei o tagata. A o iloa o Ia i ona foliga e fa'apei o se tagata, ua fa'amau lalo o Ia e Ia lava, ua na anaana ua o'ina maliu, o le maliu lava lea i le satauro. O le mea lava lea ua matua fa'aeaina ai o Ia e le Atua, ma

foaiina atu ai ia te Ia le suafa e silisili i suafa uma lava.

Ia tatou o pea i le i'a a le tautai. Ia tatou usita'i ma fa'alogo i le Atua ma Lona finagalo paia, ae aua le faia o tatou lotu. Leaga o iina e malepelepe ai aiga, mavaevae ai nu'u, fetaua'i ai malo ae maise o le nunu ai o le toau o Lana Ekalesia.

Soifua ona o Iesu, Amene

**Osa Nanai (FS)  
EFKS Caboolture,  
Pulega Purisipeni Matu,  
Matagaluega Kuiniselani**

# Tuaiti Laimeni Muti 1837-1899

## DWIGHT LYMAN MOODY

### O le Faifeau e le'i Faauuina Aupito Logologoa

### *O le 'Au Toe Faaolaola*

E le'i ma'oti se tali atu o le ola auauna o Tuaiti Muti i le Tala Lelei i lea vai taimi, ae ui i lea na ia lagona lava le papa'i mai i lona tagata o le Agaga o le Atua. O tausaga e fitu na sosoo ai, a felata'i mea o iai Betsy ma lana fanau, ona ia faapotopoto lea o latou ma latou o i le lotu. ma latou fai'aiga faatasi i le afiafi o le Aso Sa. O ia taimi sa mafuta ai faatasi ma lona tina ma ona uso ma tuafafine, o ni taimi le mafaagaloina lea ia Tuaiti Muti. O le taimi atoa na a'oga ai Tuaiti Muti e na o le fa tausaga ae mae'a, a ua sefulu ai lea o ona tausaga. Mulimuli ane, na ia manatu ai ua ono mafai ona faigaluega e lagolagoina ai ia lava, ma fesoasoani ai foi i lona aiga i mea tau tupe. Ina ua sefulu fitu ona tausaga, na manatu ai loa o ia ua oo i le taimi e saili ai sona lava lumana'i. Ona aga'i ai loa lea i le aai o Boston ia Aperila 1854.

#### **O se Tama'i I'a i se Vailepa**

O Samuel ma Lemuel Holton o ni alii (uncles) o le aiga o Muti, sa malosi lo la fesoasoani i le aiga o Muti i tausaga e tele ua mavae. Na siitia ia alii ma o la aiga i Boston ma faatuina ai ni a la pisinisi na manuia - o pisinisi faiseevae uma e lua. Ua oo nei ina fia alu iai Muti i le mea o iai ona 'uncles'. E le taumate lava le ofo o Muti ina ua vaai i lenei aai, aua e silia ma le 150,000 ona tagata pe a faatusatusa i le na o le to'a 1000 o tagata o le mea o loo nofo ai nei. O le vai taimi o le 1850 o se vai taimi o ni suiga tetele i le atunuu o Amerika. I le amataga o le sefulu tausaga o le vai taimi o le 1850, na o le 8571

maila le umi o le ala nofoaafi i le atunuu atoa. Ae oo mai i le 1860, ua atoa le 30,000 maila ala nofoaafi. O tala 'a'ave o nuu ua oo iai nofoaafi ua fai nei ma faatosina ia Muti. O lea na faaaoga uma ai loa lana tupe sa iai i le totogiina o lona pasese ae malaga mo Boston. O se amataga maoa'e lea mo se tagata o le a lauiloa mulimuli ane e le lalolagi atoa.

O Muti o se tagata e matua talitonu ia te ia lava. E loto tele ma le fo'i i se mea e mana'o ai. O le mea lea e tau 'alofia ai o ia e nisi tagata. O le ala lea na fautuaina ai o ia e lona 'uncle' o Samuelu e aua le nofo i Boston. Peitai e na o le fa masina o le lapata'iga lea a Samuelu, ae tu'itu'i atu i le faitoto'a o lona fale, ma lona mana'o e fia faigaluega i le faleoloa o lona 'uncle' ma nofo ai. E le'i faia iai se ofa a lona 'uncle'. Ona gugutu ai lea o Muti o le a savali i Niu Ioka e saili ai sana galuega. Na fesili Lemuelu ia Muti pe ua fesili i le isi ona 'uncle' o Samuelu, aua na talitonu o ia e maua ai se galuega a Muti, ae tali Muti e leai, ma e faitalia lava Samuelu pe fesoasoani ane pe leai, ae o le la na te iloa o loo ia feosofa'i e su'e sana galuega.

Na fautuaina e Lemuelu Muti ina ia onosa'i ma loto maulalo, ma faalogo i e matutua ae aua le loto ma'a'a. Ona toe alu ai lea i lona 'uncle' o Samuelu. Ona fai lea iai o Samuelu: "Tuaiti, ou te popole ona ou te talitonu e le umi ona e faigaluega iinei ae e mana'o e te pule i le pisinisi. O le aufaigaluega, e fiafia e faalogo ma fai le mea ou te faatonuina ai i

latou. Afai e te sau ma e galue i le mea e gata mai ai lou mafai, ma e fesili pe a e le iloa se mea, ma ia e folafola mai o le a e alu i le lotu ma le A'oga Aso Sa, ma ia aua ne' e alu i se mea e te iloa e le fiafia lou tina e te alu iai, o le a avatu le avanoa e te faigaluega ai. O le a tuu atu se taimi se'ia oo i le Aso Gafua, e te mafaufau ai."

E le'i mana'omia e Muti se taimi e mafaufau ai, a ua ia talia le galuega ua ofoina ane e Samuelu e galue ai i le faatauina atu o oloa. Na maua foi e lona 'uncle' se mea e nofo mau totogi ai mai ni uso a Kerisiano, faasino iai le mea e mafai ona faatau mai ai ana meaa'i, ma faasino iai le falesa o le Mount Vernon Congregational Church (Ekalesia Faapotopotoga i Mount Vernon).

O tausaga na sosoo atu ai na vave lava ona faasolo ina tagata matua ia Tuaiti Laimeni Muti. Ua fiafia i le galuega, fetaia'i ma feiloa'i ma le toatele o tagata, ma ave ana tusi faitau mai le faletusi o le YMCA. E na o le tolu masina, ae avea o ia ma tagata faigaluega aupito lelei ana faatau, i le pisinisi a lona 'uncle', ma ua lava foi ana tupe maua na mafai ai ona ia faatauina ni seevae mo lona tina ma ona uso ma tuafafine oi lo latou nuu.

Na oo lava ina avea o ia ma tagata e faalagolago iai lona aiga mo le tausiga o latou i mea'ai ma tupe. O lona aiga potopoto ua fiafia e faaulufale mai o ia i le saofa'iga a le aiga, na avea lea ma fesoasoani tele mo ia. Na faalogo ma usitai o ia i fautuaga a lona 'uncle' o Samuelu e to'aga i le lotu, e ui lava e le fiafia o ia i lotu. Na matauina lava e tagata le moe o Muti i le taimi o sauniga, ona o lona vaivai mai lona galue umi i le pisinisi a lona 'uncle'.

mai le tusi: "God's Generals" tusia e Roberts Liardon faamatalaina e Afemata T. Apelu Aiavao

# Amuia se nuu e fai le Atua mo latou Atua

**Blessed is the nation whose God is the Lord.** Amuia se atunuu poo se malo e fai le Atua mo latou. (Salamo 33:12)

Sa fesiligia e se tasi alii le peresitene o le malo o Amerika, pe o le a le mea e ta'uta'ua ai lona malo. Mafua i se a ona malosi lou atunuu? O le tamaoaiga, o le malosi faafitafita, e tulaga ese lava lou malo.

Why is your nation so famous, so rich, and so powerful? Tali le peresitene: It's those people behind the scene; those people behind the curtain. O tagata o loo i tua o le pupuni; tagatanuu o loo faia le galuega tautua. I le ma le malo e talitonu i le Atua o Malo. Fai mai le fai salamo, 'Amuia se atunuu, se malo ma se nuu e fai le

Atua mo latou Atua.

Sa ou fesili i lo'u uso laitiiti sa i le ami a Amerika, na alu i le taua i Iraq. Ona o le atunuu lea o Isaraelu. Aua o loo tatou iloa mai le Tusi Paia ma le talafaasolopito o le Ekalesia - o Isaraelu o le nuu filifilia o le Atua. Manatua foi soo se malo lava e faasaga tau i le nuu o le Atua, e 'au le Atua ma Isaraelu ma manumalo ai i ona fili uma. Ae fai mai lo'u uso ia te a'u, o lana vaai ia Isaraelu, o le isi lenei malo e lagolago tele e Amerika. E atamamai, tele a latou metotia poo a latou plans mo osofa'iga o lo latou fili. E le'i atoa se aso na alu ai le osofa'iga a Isaraelu i fitafita a malo o Arapi ae toe fo'i mai ua manuia. O lona uiga o loo iai pea le Atua i tua o Isaraelu ma ona tagata.

## Kuresa le Sili o Peresia

Salamo 126:1-5: "Na faafo'isia mai e le Alii o Siona nai le tafeaga, ona tusa ai lea o i tatou ma tagata ua fai a latou miti. Ona tumu ai lea o tatou gutu i le featani, ma o tatou laulaufaiva i le leo fiafia; ona latou faapea ane lea i nuu ese, Ua faia e le Alii mea tetele mo i latou. Ua faia e le Alii mea tetele mo i tatou; ua tatou fiafia ai. Le Alii e, ia e faafoisia mai la matou tafeaga, faapei o vaitafe i le itu i toga. O e lulu saito ma loimata, latou te seleseleina ma le alaga fiafia. O le ua alu atu ma tagi fano, o loo ave le saito e lulu, e fo'i mai lava ia ma le alaga fiafia, o loo aumai ana fusi saito."

Na faia e Kuresa le Sili o Peresia se mea e le'i faalogo lava iai. Na ia faamauina se mea ofoofogia na ia faia i se papa'ele e sefulu inisi le umi, lea o loo teuina pea i le British Museum e oo mai i nei aso. O loo tusia ai i le papa'ele (The

Cyrus Cylinder) upu nei: "O a'u o Kuresa ua ou faapotopotoina uma mai o latou tagatanuu, ma toe faafo'i atu ia i latou mea sa masani ona nonofo ai." O lona uiga, ua ia toe faafo'i i o latou nuu tagata na ia ave faa-tagata-o-tauaina.

O se mea fou lea, poo se faiga fou lea ua tula'i mai i ia atunuu anamua, anamua lava.

O Asuria ma Papelonia e latou te faato'ilaloina nuu ma latou ave faatagata-o-tauaina i latou, ma fai ma a latou pologa. Peitai ina ua faato'ilaloina e Peresia ia Papelonia, na ia toe faafo'i tagata i o latou nuu. A le manatu ai la tagata Isaraelu ua se miti le mea ua tula'i mai!

O loo faamauina foi e le alii Roma tusi talafaasolopito o Livy se mea faapea na tupu tusa ma le 200 tausaga mulimuli ane ina ua manumalo Roma ia Eleni. Na nonofo tagata Eleni ma faatalitali

E tolu tausaga se iai lo'u uso i le taua lea. Fai mai a ia, E leai se popole o latou, ma nisi foi alo o Samoa sa iai. Aua sa latou lagona le mafanafana o talosaga a le atunuu ma o latou aiga. E fo'i mai lava i Samoa e pei lava na o e tafafao. A o le filemu na latou o ai, ma le puipuiga o le malo o Amerika ma Samoa uma.

Manaia Samoa o loo faavae i le Atua lou malo. Ae tuufesili lo'u mafaufau, pe aisea ua tele ai le amio mataga, ma mea leaga ua aliali mai pea ia Samoa i nei aso. Ua tele le solitulafono; o le fasioti tagata; o laau faasaina; o le ona; o le sauaina o fanau teine; o le fasi ava.

Ta'ita'i o Samoa, ta'ita'i o Ekalesia, tautuana le tatou tiute faata'ita'i. Matua, alii ma faipule, lau pito laau aua e te nofo tamala iai, e taua pea le feau taugologo. Ioe! aua e tu manu ae le tu logologo. Ua vaaia le tele o tapua'iga ma le mau lotu fou ua i totonu o Samoa, a ua atili ai le saosaoa o le amio mataga a ou tagata. Le Atua e, alofagia Samoa, si o matou atunuu pele. Aua e te tuulafoa'ia.

Samuelu Limuaa Samuelu FS, EFKS Saoluafata

pe se a se mea a fai ia latou. Ae te'i ua sau le faaaliga o le malelega mai le tupu, ua faasa'olotoina uma aai o Eleni. Na ofo tagata, ma foliga mai o nisi ua fai ni a latou miti, e pei o upu o lenei Salamo.

E faapena le tala lelei, o le tala o le fiafia, olioli ma le featani. Ua faia e le Alii; oloo faia e le Alii, ma o le a faia pea e le Alii mea tetele ma le ofoofogia mo i tatou.

**Kanana** - o le igoa o le

atalii o le atalii o Noa, ma o le laueleele ua ta'ua o Kanana i le Tusi Paia, lea ua iai nei i ona po nei, ia Isaraelu ma Palesitina. E ta'u foi o le Nuu na Folafolaina - The Promised Land.

# Osiga Feagaiga a Sataoa ma lo latou Faifeau - o Faresa Faresa

*mai le itulau muamua*

Lelei, a o taavale ua tumu ai le malae tele i Sataoa-tai. E matua faafiafia loto le mea sa iai, le toatele o le nuu, a o se paolo tau i le Tala Lelei na masii atu, sa auai ma lagolagoina le osiga feagaiga a le faifeau ma lona nuu fou, le Susuga ia Faresa Faresa ma le faletua ia Mae'e.

O le aso 27 na fai ai le osiga feagaiga. Na amata lava i le usu a le nuu na auai le paia i Alo o Tunumafono, o Taoa ma Afemata, faapea Seiuli ma le Ma'opu ma le Tama a le Uso. Le mamalu i le Fetalaiga ia Faleafulugogo faapea le Faletolu. O le paia lava lea i le Aiga Sa Tunumafono, le Falefa o le Uluga Tanifa, le Faauluuluga o le Aiga Sa Tunumafono ma le Faasuaga, Taulauniu ma Aitu Tagata ma upu i le Alataua.

Aua le to'ai taunuu o so matou paolo tau i le Tala Lelei, le alii faifeau le Susuga Faresa Faresa ma le faletua.

Na sosoo lea ma le usu a le aulotu, le Susuga i le A'oa'o Fesoasoani sa tausia le aulotu mo masina e iva a o le'i taunuu se faifeau tofia, le Afioga Afemata Palusalua Faapo II, Susuga i A'oa'o ma Tiakono, sa'oa ma faletua ma tausi ma le pa'ia i le Ekalesia i Sataoa-tai.

Na faaalua e le alii matua o le nuu, Afioga Afemata Apelu Aiavao, i le Susuga Faresa ma le faletua, o Sataoa e le tatalaina ni ana feagaiga e osi ma a latou

faife'au. E tuu oti! O le faifeau na mavae atu nei, na malolo i luga o le iuga a le Ekalesia e faapea, a gasegase le faifeau ma ua le mafai ona ia faia le galuega, ona malolo lea.' O le ala lea ua tuua ai le galuega e le faifeau. A o le osiga feagaiga lava a lo matou nuu, e tuu oti. Peitai a oo i se aso ae musu le faifeau e toe galue ia matou, ia, o le mea lena i le va o ia ma le Atua. Matou te le faia. A o matou lava ia, e tuu oti a matou osiga feagaiga.

Na faaali foi e le Afioga Afemata Apelu Aiavao i taulele'a, ina ia ta se paopao masa'esa'e e amata a'o ai le uua atule a le faifeau. E lelei e vave masani ai i fagota i le aloalo ma le ava i Sataoa ma Lotofaga, pe a tofutofu soo i le sami o le nuu, le sami lea e lumafale iai le maota o le faifeau .

O le sauniga o le faapa'iaga na auai le Matagaluega a Safata ma Siumu, Susuga i le Faifeau Toeaina ia Kereta Fuafiva, ma Susuga i faifeau ma faletua, na auai foi le Susuga i le Faifeau Toeaina ia Palemia Tauiliili mai le Itu o Tane, o le aiga o Faresa. Ma le faifeau a Faresa mai Fusi, Safotulafai, Susuga ia Mafi Faamoe, o le lupe faalele a Taoa ma Afemata, Seiuli ma le Ma'opu ma le Tama a le Uso.

Na ta'ita'i le Susuga e le Faifeau Toeaina, Susuga Kereta Fuafiva, mai le EFKS i Vaiee.

Na sosoo le osiga feagaiga ma le taumafataga tele, sosoo ai ma

faaaloaloga o lea aso. O faaaloaloga ia na iloa ai, e silia i le 60 faifeau na auai i le osiga o le feagaiga. Ae le'i ila ai le Aiga Malosi, le Aiga Sa Tunumafono. Ua masani.

O Faresa e mai Fusi Safotulafai. O se lupe faalele faasino i le pa'ia i le afio o Leilua ma ona Alo, le na 'ai malae le Matua ia Fauolo, lo la To'alua Tuilagi ma Namulauulu ma upu ia te oe na pule Safotulafai.

O le faletua ia Mae Faresa, e mai Moataa, o le lupe faalele faasino ia Tofaeono ma Tama o Asi ma Patu. I la'ua na ta'i, Tamapua ma Manogiamanu ma le nofo i Ituiga ia Fuata.

O le Aso Sa na sosoo ai na fai ai le toonai faatasi a le Ekalesia i Sataoa ma le latou faifeau fou, ma faamanatu ai le aso fanau o le faifeau, e atoa iai lona 44 tausaga, ae atoa iai le 18 tausaga talu ona tuufaatasia le ulugalii i le sakalameta o le faaipoipoga.

O se aso fiafia i le aulotu ma lo matou nuu. Aua na faaalua ai le alofa ma le agalelei o le Silisiliese, i lona liligiina ifo o ana faamanuiaga e le gata i luga o lo matou nuu o Sataoa, a o so matou paolo tau i le Tala Lelei. Ma ia tumau atu pea i le Silisiliese le viiga ma le faamanu mai nei e oo i le faavavau.

saunia e

Tamalema'i Apelu Tautala TK  
EFKS Sataoa



# O le Agaga o le Atamai i Gagana

*mai le itulau e 5*

Lelei mo le lalolagi atoa. O le atamai i gagana o se galuega ua faia e le Atua e ala i lona Agaga. “Ua faatutumuina foi i latou uma i le Agaga Paia, ua afua ai ona tautala i gagana eseese, pei ona foaiina mai e le Agaga o le gagana ia te i latou (Galuega 2:4).

**5. O le gagana faale-Atua e fo’ia ai faafitauli.** O le gagana faale-Atua, o se gagana ua atagia ma manino ai uiga faale-Atua. O le uiga faale-Atu e suia le ita ma le fia tauimasui i le alofa. E liliuina le vevesi i le filemu. E faamanino mea uma ina ia manino ma malamalama. “O le tali filemu e liliueseina ai le ita; a o le upu faatiga e tupu ai le ita.” (Faataoto 15:1)

Ua o mai ia Iesu le au faresaio. Ua latou momoli i ona luma le fafine ua mulilua. Ua latou tofotofa ia Iesu ina ia molia ai o ia. Ua fetalai Iesu, “O so outou e leai sana agasala, ia lua’i togi se maa ia te ia.” Ua latou faalogo ai ona ta’ito’atasi lea o i latou ma alu i fafo e afua mai i toeaina.” (Ioane 8:7-9), Ua fofoina le ola tofotofa ma le vaavaai masei. Ua popoto e ‘eu le fasilaau i le mata o le isi, ae le vaai le utupoto ua i o latou mata.

6. O le gagana e avea ma mailei i le tagata. E masani tagata i le fai o folafolaga, ae mulimuli ane ua le faatinoina. E taatele ia faiga i le vai taimi o palota, aua e naunau i le tofi. Peitai e toatele nisi ua le tausi ia latou upu. Ua faapea foi i tala a le Tusi Paia. E ese folafolaga i upu, ese foi faatinoga. Ua faapea Peteru le soo o Iesu, na soona pisi vale lava ma folafola lona mulimuli ia Iesu e oo i le i’uga. Na silafia e le Alii Peteru ma lana na folafola. Na manino foi ia Iesu le le mafai ona savali

Peteru e tusa ma ana upu. Na taunuu mea uma na fetalai ai Iesu ia Peteru. ‘Ona augani ai lea o ia ma tauto, ua faapea atu, “Ou te le iloa lava lea tagata.” Ona vivini lea o moa. Ona manatua lea e Peteru o le upu na fetalai atu ai Iesu ia te ia. “E le vivini moa seia e faafiti faatolu mai ia te au.” (Mataio 26:74-75)

E ese le gagana ese le faatinoga o upu o le tatalo a le faresaio, ua iloa ai lona loto faamaualuga. Ua folafola lona atoaatoa i luma o le Atua faapea ma tagata. O le gagana faasausili ma le vaai maualalo i isi tagata (Luka 18: 11-14) Na tula’i le faresaio ua tatalo lemu atu i nei upu, “Le Atua e, ou te faafetai atu i te oe, ina ua ou le pei o isi tagata ao lafoga.” A o le tagata ao lafoga.....ua faapea atu, “le Atua e, ia e alofa mai ia te a’u le tagata agasala.” (Luka 18:9-14)

O le gagana ua iloa ai le faamaualuga ma le fia malosi. Ua manino ai le tagata ua faamoemoe i lona lava malosi. Ua manatu ua atoa ona lelei i le silafaga a le Atua. O le a la se mea e toe faia e le Atua, pe afai ua ia manatu ua ia atoa?

**O Iesu Keriso o ia tonu lea sa iai le Agaga o le Atamai i Gagana**

Ua muai iloa le eseese o gagana i le Tusi Paia. Ua iloa i le fauina o le ‘olo i Papelu. Ua faaeseese e le Atua gagana, e tusa ma lona finagalo. Ua faataape’ape ma taofia ai galuega a tagata ua le lelei i le silasila a le Atua. Ua faataape’ape ai foi tagata ina ia aina ai le lalolagi. Atonu o gagana ia na a’oa’oina ai tagata e uiga i le Atua. Ua auina mai e le Atua lona Alo i le lalolagi. Na fai ma faaa’oa’o o le ua iai le Agaga o le Atamai i gagana. Ua manino i ana a’oa’oga ma galuega faaola a o iai le lalolagi. E a’oa’o ma faatino. E saunoa i upu tonu ma upu moni

mai le Atua. Na fai ma vailaau i loto mafatia, puapuagatia ma faanoanoa. Na avea ana upu ma malamalama i e ua nonofo pea i le pogisa. Na lototele pea o ia e savali i le faamoemoe o le Atua lona Tama. O ia lava o le atamai o le Atua ua auina mai i le lalolagi. Na taunuu i le satauro ma maliu ai. Na toetu manumalo nai le oti ma le tuugamau. Ua afio i le lagi maauina mai lona Agaga Paia. O le faaolataga ua fai mo le lalolagi atoa. Ua avea le faaolataga ma faamoemoe o le Atua ia toe faatasia ai lana fanau. Ia maua e tagata uma le ola faavavau.

Ua faaleoina mai gagana eseese i le Aso Penetekoso e ala i le mana o le Agaga Paia, vavega o le Alofa Tunoa o le Atua. O le Tala Lelei ia logo atu i lana fanau ua nonofo i tuluiga uma o le lalolagi. E faaaogaina ai e le Atua le tagata atoa, tino, mafaufau ma le agaga. Tau ina ia tatou maua faatasi le Agaga o le Atamai i Gagana, e fai ai pea i tatou ma meafaigaluega i aao o le Atua, i tiute ma nafa tausi eseese o feagai ai. O le Aposetolo o Paulo ia Korinito, “Afai ou te tautala i gagana a tagata atoa ma agelu, ae leai so’u alofa, ua avea a’u ma ‘apamemea taalili. poo se sumepalo tagitagi...” (1Korinito 13:1-3).

Le Ekalesia EFKS e pele i le loto ma le agaga, ua tiu ma siva i vasa e fia i lau gagana faale-Tala Lelei, lea ua matou sa aai i maa o malie ma ‘oa’oa i faleseu i le faatuatua. Ua tu matila le fu’a o le faaolataga i atumotu o le Pasefika, faapea Samoa, ona o le Agaga o le Atamai i Gagana ua e la’ei ma saunoa iai, ua fetalai foi i lou soifua ma lo’u ola faatauvaa.

E faapito augafa lava se fautuaga i Afioga i Tiakono, e le lavea ai le vasega o Faafeagaiga. Ua faamalo  
*faaauau itulau e 11*

# ITULAU MO TUPULAGA TALAVOU

## Se aso pe a oo ina ou Matua

### *O se tala mo Tupulaga Talavou - ma Matua*

E na o le fitu o'u tausaga a o le tele ia o mea ua fenumia'i ai nei lo'u mafaufau. Fai mai le vaega lea e matutua atu ia te au e oo i se aso ona ou malamalama ai lea i ia mea o loo fenumia'i ai lo'u mafaufau. O le faalavelave ou te mana'o e oo mai nei lea aso, lea taimi ina ia ou malamalama ai i ia mea. E fai mai soo, ia ou tautala "faamolemole", ia ou amio lelei; taetae a'u otaota; ae tele ina ou le faia ia faatonuga. E iai ma le isi mea e ta'u e tagata matutua o le oti. Ou te iloa e le o se mea lelei ma fiafia ai tagata, ae ou te le iloa pe aisea. E leai foi se isi na te faamalamalamaina lelei mai ia te au. E le taumate e iai se aso ou te malamalama lelei ai i le mea e ta'u o le oti.

E le masani ona ma faatali pasi mo le a'oga faatasi ma Grace i le taeao, a o lea ua faatali pasi i lenei aso. Toe lua vaiaso oo mai le Kerisimasi, ma o lea ua sinasina le kiona o le aisa i fafo na to'ulu i le po anapo. Tuai ona oo mai le malologa ae se'i ou alu i fafo ou te taalo ai i le kiona. Ah! lea ua tu le pasi i lo matou lumafale!

Ua sefulutasi tausaga le matua o Grace, ma ua tau le fiafia e fusi a'u ma faamavae mai. A o le taeao lea, oi, ua matua fusifusi ma faatofa mai. Ou te le iloa pe aisea.

O le mataupu o le tusiata, art, le lesona lea e pito mai. Na ou tusia se ata mo le faiaoga o Grace. O le ata o le tama meamea o Iesu i lona moega lauvao o meaai a manu i le falepovi. O loo faapepepe i ona

luga le agelu. O lea foi ua tuua le a'oga, a ua ou le iloa pe o fea o iai le ata na tusi. Ou te le'i tuua ia Grace. Ua sau le isi faiaoga ma fai mai na te momolia au i lo'u aiga, ma fai mai ua lavea Grace i se taavale.

O lea ua ou savali atu nei i lo matou fale. O le la e tagi mai Mum. E le se mea masani lea i lo'u tina. E le matagitagi gofie lo'u tina, tusa lava pe leaga i fea sa'u amio i se aso. O lea e nonofo mai i le matou potu malolo leoleo e to'alua. E le o fai mai lava se isi pe aisea ua o atu ai i lo matou fale leoleo. O lea lava e talagu le 'au matutua ae ou te le iloa pe o a a latou tala o fai. Atonu o se aso pe a ou matua ona ou iloa lea. Na o lo'u tama lava lea ua talanoa mai.

"E te alu e te nofo ia Misi Lifi mo ni nai aso." Ou te fiafia ia Misi Lifi. Ae sili ona ou fiafia matou te nonofo ma lo'u tina ma lo'u tama. E leai lava ma se isi e faalogo mai ia te au. Tau ia ina teu i lo'u mafaufau le mea na fai mai ai lo'u tama. Ua faanoanoa lava lo'u tina. E le taumate e le na o le lima o Grace le la e gau. Na o le tasi lava la'u mea na fai o le popo o Mum i le tau'au ma ou musumususu iai, pei foi ona ia faia ia a'u pe a ou faanoanoa, 'Aua e te popole o le la e lelei Grace.'

E leai lava se isi o sau e ta'utino mai ia au le mea o tupu. Ae ua ou matua popole lava i le tagi o Mum. Ae ua ou faalototele lava a'u ia te a'u ma ou faapea ifo, 'E leai se mea o tupu ia Grace.' Ua uma ona fai

o la'u meaalofa o le Kerisimasi mo Grace, ma ua uma ona ma talanoa e ma te nofonofo i lumafale ma fai ai ni a ma agelu 'aisa i le kiona pe a oo mai le Kerisimasi.

E masani lava ona tausua lo'u tama i isi tagata ma fai iai o a'u e puupuu lava lo'u onosa'i. O lona uiga ou te le fiafia i ni ata e uumi tele, pei o le po lenei ua matua umi tele.

O lea la ua o mai o'u matua. E fia talanoa mai lo'u tama ia a'u, ae ou te le o fia faalogo i se mea o ia fia fai mai ai.

"Ua alu Grace i le lagi."

Ua ou tagi nei! Ou te le fia tagi, peitai o loo tagi Mum, o lea ua ou tagi atu ai foi ma a'u. Fai mai Mum ma Dad o le lagi o le mea lea e o iai tagata pe a feoti. Ae ou te le o talia le tala ua oti Grace.

Tele la'u mau fesili e fia fai. Ua fenumia'i lava lo'u mafaufau, ma ua ou mana'o i se isi e faamalamalama mai nei mea mo a'u. Peitai, ou te laititiiti ou te le malamalama i o latou uiga.

Ua te'a nei le Kerisimasi, a o lea lava e matua tele fesili i lo'u mafaufau, ae ou te le o fia fesili, ona ou te le manao e toe tagi Mum.

Fai mai sa faatali pasi Grace ma isi tamaiti ina ua tuua le a'oga. O le taimi lea na masau mai ai se taavale, ua le mafai ona taofiofia i le kiona maseesee e le avetaavale ua saosaoa tele, ma lavea ai Grace. Fai mai e le'i lagona e Grace se tiga.

Ua ou taumafai lava ina ia ou malamalama i le mea e ta'u o le oti. Ua ou faitau i le tele o tusi na aumai e tagata ia te au e uiga ia Sio ma le mate o lana ta'ifau. Ae ou te le malamalama tele iai. Ua oso a'e lo'u ita ma le vevesi o lo'u mafaufau. O lo'u alofa ia ia Grace, ma ua matua misia lava le ma taaalo pe a tuua le a'oga. Ua tau te'a le tagi o Mum, ma e le taumate e mafai ona ou fesili nei iai.

"Mum, aisea na lavea ai Grace ae le o se isi? Ae a lava pe ana

*faaauau itulau e 11*

# O le Agaga o le Atamai i Gagana

*mai le itulau e 9*

i ou faiva o manaia ma ou faiva faatausala. Malo lo outou alolofa i le Atua ma lana Tala Lelei. O outou lava o le poutu o le galuega. Afai ae taape le fili alii, tautuana lau faamomoli e te afio ma oe. **O le a lea faamomoli? Ia puipui malu lou tofi, lou tofi na tuu mumusu mai e tuua ua lagomau mai tia. Ia faamaoni i lau fai taulaga ma lau auunaga i le Atua. Tautuana le tagataese o loo mau ma oe, o le sui vaaia o le Atua Tala'i le Tala Lelei i le soifua manumalo o lo tatou Alii o Iesu Keriso.** O le Agaga lena o le Atamai i gagana.

E manatua pea Ave Feau o le Tala Lelei ua lago mai i tia sa i lo latou

maelega i le Tala Lelei ona o le aupega sili mai le Atua, le Agaga o le Atamai i Gagana sa faaauppegaina ai i latou e le Alii. E le faagaloina foi nai Tama Penisione i le latou tautua. Tainane foi le 'i'oimata o le Ekalesia le Kolisi Faafaifeau i Malua nei. Faafetai a'oa'o, faamalo le tautua ma le faamoemoe i le Agaga o le Atamai i Gagana, aua le faafaileleina o lupe faalele a le Ekalesia Aoao mo le Tala Lelei. Faafetai i le Laulau o le Fono Tele,

faapea le faatofala'iga aTama o le Ekalesiae pae ma auli i fonotaga a le Ekalesia Aoao. Ua to'a ma filemu le faatamasoaliiga a le nei Fono Tele i lau tofa faatupu ma lauuta faatamalii.

Fesoasoani mai le Agaga o le Atua - o le Agaga o le Atamai i gagana na te faafiafiaina ma faalototeleina ma faatumau pea lo tatou tasi i le faatuatua i le Atua.

Manuia tele lenei Fono Tele. Soifua.

Ua le fefe Eseta i le oti a ia sao lona nuu: O ana upu lauiloa:

**“..Afai ou te oti ai, oti ai pea ia!..”**

Eseta 4: 16

*A Page for Youth*

## ITULAU MO TUPULAGA TALAVOU

### Se aso pe a oo ina ou Matua

*mai le itulau e 10*

lavea se isi tagata na iai ae le o Grace?”

Ua toe tagi Mum. Pei lava sa le tatau ona ou fesili iai i lea mea. Ae te'i ua 'ata ma tago mai ua fusi atu a'u. Ma fai mai, “Auā e faanoanoa ai foi se isi aiga e pei ona tatou faanoanoa.” Ou te le iloa pe aisea na fai mai ai faapea Mum. Ae ou te manatu e sili ona tuu ai i i a'u fesili.

O ni nai vaiaso mulimuli ane, ona fai mai ai lea o o'u matua, o le tamaloa na lavea ai Grace, na na iloa loa ua oti Grace ia ia, ona nofo foi lea ma fasioti ia - ua pule i lona ola.

Ou te malamalama la i le tala lea. Ona ou fai atu lea, “Ua lelei la, a Mum? O lea ua toe tau'i lana mea na fai.”

Ua nofo nei Mum ma vaai toto'a mai ia a'u, ma fai mai lana tala e tau le lagona: “Leai! E le lelei! Aua o lea ua oo foi mafatiaga ma le faanoanoa i si ona foi aiga, e pei ona tatou oo iai. Leai e le lelei.”

O lenei ua sefuluono o'u tausaga, ma ua tele foi mea ou te iloa, e le pei o le taimi o fitu ou tausaga. E le lava le fitu tausaga o le matua, e malamalama lelei ai i le mea e ta'u o le loto faamagalalo. A o fitu ou tausaga, sa ou le malamalama pe aisea na le fia tagolima ai o'u matua i le tamaloa na oti ai Grace, ma talosagaina sona faasalaga mamafa, ae na ou manatu i lena taimi atonu e sa'o la'ua.

O lenei ua pupuna a'e i lo'u mafaufau uiga o upu a Mum na fai mai, e pei foi ona talanoa mai ai tusa o le iva tausaga ua te'a. Talu

mai lena taimi, e tele lava taimi sa faigata ai ia te au ona ou faamagaloina se isi. Ae pei o se manulele e pesepese mai pea i lo'u loto upu na tautala ai Mum. Ma ou manatu ai, afai e mafai e Mum ona faamagalalo le tamaloa na oti ai Grace, aisea ou te le mafai ai? E umi lava se taimi ou te le malamalama i le uiga o le oti o si o'u uso. Ma o lea ua ou talia le uiga o mea - e umi se taimi ma te le feiloa'i ai ma Grace, ae ou te talitonu, ma te toe feiloa'i i le lagi. Ou te talitonu foi o loo fiafia Grace ma e ma te toe feiloa'i i luga.

Ua pepe o'u manu'anu'a faale-maufaufau, ua mamate mea sa ou mafatia ai. Ua ou malamalama foi e leai se mea o iai i le fiafia i le isi aso, ae faanoanoa i le isi aso. Ua tele foi lo'u malamalama i le oti.

Ma e le toe galo ia te a'u lesona mai ia Mum, e uiga i le loto faamagalalo moni.

tusia e Andrea Gonsalves  
faamatalaina e  
Afemata T. Apelu Aiavao

# Oti Faa-Maturo le Ulugalii ma le la Tama Teine

O se tala leni i le sauaina ma le fasiotiga faa-maturo o Ioane Vona (John Warne) (o le tagata fai meafale), ma lona to'alua o Elisapeta ma le la tama teine o Ioana. E mafua ona o lo latou tetee i le talitonuga o le Ekalesia Aoa, i na ona po - 500 tausaga ua mavae, i le liliu mo'i o le areto ma le uaina i le tino ma le toto moni o Iesu, pe a uma ona faapa'aina, i le sauniga o le faamanatuga, poo le misasa. O Newgate na faafalepuipuiina ai Vona, ma o ina sa fai ma asiasi atu iai le epikopo o Pona (Bonner) ma isi tagata o le lotu, ma fautuaina Vona ina ia sui lona talitonuga, ma liliu atu e lagolago le mea e talitonu iai le Ekalesia Aoa. Peitai ona o lona tutumau pea i lona tetee i le liu moni o le uaina ma le areto i le toto ma le tino o Keriso, o lea na i'u ai e faasalaina o ia i le oti. (Ioe, sa fai sala oti a le lotu i la aso ua mavae!) Ae na faasaoina lona ola ona ua tuuina atu se apili i le tupu. Ae le'i suia ai lava lona tetee i le areto ma le uaina e faapea o le tino moni lea, ma le toto moni lea o Keriso. Iva tausaga mulimuli ane ai ae toe molia foi o ia i le mea lava lea e tasi.

O se aiga ausage e pei o le aiga o Vona ma Elisapeta, e le ono maua ai ni faamaumauga o ni tala o le aiga, ae mafai lava ona tatou mate'ia o se aiga e faalatalata i le Atua, ma faitau le Upu a le Atua ma latou faaogaina i lo latou ola i aso faisoo. O le ituaiga aiga lea sa fai ma ivitu o faiga faa-Porotesano i Egelani. E matata'u i le Atua, e talatalanoa le ulu o le aiga, le tama, i mea tau i le Atua. E aliali mai i o latou uiga fesoasoani ma agalelei i o latou tuaoi. E feasiafia'i foi ma fai a latou mafutaga ma isi aiga ma talatalanoa i mataupu tau i le Tusi Paia. Sa latou iloa le mea moni, ma sa matua fiafia i latou ina ua soloa'i ane Eteuati VI e fai ma tupu, ma maua ai le saolotoga e fai ai le tapuaiga moni i le Atua, ma le

laugaina o le afioga a le Atua.

Na faaauau pea lo latou faamaoni ia latou sauniga, ma tutumau i o latou talitonuga i le Atua, ina ua maliu Eteuati VI, ae soloa'i ane i le nofoalii ia Maria. Peitai ona o tulafono fou ua fai e aafia ai a latou tapuaiga, ona amata ai lea ona faalilolilo ona mafuta ma faapotopoto i o latou fale. Na amata le nofoaiga a Maria i le 1553. O le tausaga na sosoo ai na faauliulito mai ai ni ao pogisa, ma ni tapenapenaga mo le sauaina o le fanau a le Atua. Ae le'i tuua ai lava le faapotopoto o le 'au paia i o latou fale ma fai ai a latou sauniga ma talosaga.

O le afiafi o le aso muamua o Ianuari 1555 na potopoto ai ni Kerisiano se to'a 30 mo talosaga ma le faamanatuga i se fale o se aiga i Lonetona. A o tootuli i latou ma tatalo, ae taunuu atu ni leoleo ma ave i latou ma lafo i le falepuipui.

O nisi o lea to'a tolusefulu e aofia ai Ioane Vona ma lona to'alua o Elisapeta. O Ioane Vona faato'a 29 ona tausaga, o loo talavou lava. E faatolu ona su'esu'eina Vona e le epikopo o Pona, i le masina o Me 23, 24, 25. Ae sa ia tetee lava i le talitonuga o loo a'oa'oina e le lotu, o le areto ma le uaina o le faamanatuga, o le toto ma le tino moni lea o Keriso pe a uma ona faapa'aina i le faamanatuga, poo le misasa. Ina ua mae'a le su'esu'ega mulimuli o Ioane Vona, ona faasalaina ai lea o ia i le oti. E lima aso mulimuli ane ae faataunuuna lona faasalaga. A o le'i faia lona faasalaga, ae ia tusia lelei i lalo lona talitonuga i le mataupu tau i le uaina ma le areto o le faamanatuga, ma lona talitonuga i le Alii o Iesu Keriso.

Ua tumu le falepuipui i le 'au Kerisiano faasalaina ona o o latou talitonuga i le mea moni, e aofia ai ma le to'alua o Ioane Vona o Elisapeta ma le la tama o Ioana. O le mataupu autu lava o moliaga,

o le a'oa'oga lea a le lotu e faapea o le areto ma le uaina, o le tino moni, ma le toto moni lea o Iesu Keriso. O isi moliaga, o le le lolotu.

E tele taimi sa tula'i ai Elisapeta i luma o le faamasinoga e tali i ona moliaga, ma faasufi e ta'ita'i o le lotu ina ia fultua i ona talitonuga, ae le mafai lava Elisapeta. Se'ia oo lava ina fai atu Elisapeta - "Faia le mea tou te manana'o iai." Ona faasalaina ai lea o Elisapeta i le oti.

O le to'a sefulu na falepuipui faatasi ma Elisapeta, e to'a ono na susunuina faatasi i le afi, e to'atolu na mama'i i le falepuipui ma feoti ai. O o latou tino na lafoa'i i le alatele, ae o atu nisi o uso Kerisiano i le po ma ave i le tanu lelei.

Sa asiasi atu pea Ioana i ona matua a o iai la'ua i le falepuipui. Ma e na oo foi ina pu'eina Ioana, faatasi ma nisi talavou, e ta'ita'i o le lotu, ma molia ona o lona pipii i talitonuga o ona matua e uiga i le mataupu i le faamanatuga (misasa). Na molia o ia i luma o le suesuega e ta'ita'i ai le epikopo o Pona (Bonner), o se tasi o tagata taua ma le aloa'ia o le lotu.

Tatou vaai atu iai faale-mafaufau, i le aiga ua na o le teine talavou e le'i atoa sona 20 o ona tausaga. Ua uma ona fasioti lona tama; ua uma foi ona susunuina lona tina ma lana tane na la toe nonofo ina ua oti Vona. Ua tele foi ni tausaga oi totonu o le falepuipui ona o lana molimau mo Keriso.

Ae le'i maluelue lona tutumau i ona talitonuga ia Keriso, ma ia ta'utino, talu lava le taimi na o le 11 ona tausaga, e le'i fiafia i le talitonuga lea fai mai o le areto ma le uaina, o le tino moni lea ma le toto moni o Keriso. O loo tumau pea lona tetee iai. E ui lava ina faasufi; e ui lava ina faafefe; e ui lava ina fautuaina e toe fo'i atu i le lotu, ae le mafai lava. Fai mai Ioana, "Fai le mea tou te manana'o iai, ma e ou te tatalo ina ia outou faia le mea e fiafia iai le Atua." Ona faamaonia ai lea o ona tuua'iga, ma faasalaina ai i le oti, i le susunuina faatasi i le afi ma isi Kerisiano e to'afitu, i le aso 27 Ianuari 1556.

# O E UA FAI'ILAGI LE FOLAUGA

## Fainu'ulelei Tulatoa Aoe'e Mulivai Asi.

10 Aperila 1949- 27 Fepuari 2018

“ .....ua le nofoia foi le nofoa o Tavita....” ( 1 Sam. 20: 25d)

O le aso 26 Iulai 2004, a'o faataotolia Fainu'ulelei Asi, i le ward 4 o le Taranaki Base Hospital, na asia ai le gasegase o lenei tama, ma ia finagalo ai, e ala i le musumusuga a le Agaga, o le a faavaeina/faatuina le Ekalesia EFKS i le aai o New Plymouth.

Na taunuu lona faamoemoe, ina ua faatu aloaia le Ekalesia i le aso 11 Setema 2004. O lona uiga, e mafai ona faaupuina faapea, o Fainuulelei, o le mea faigaluega a le Atua, na valaauina, na te faavaeina le Ekalesia, i lalo o le 'a'ao ta'ita'i o le Alii. O lea lava aso, na faauuina ai o la tofi tiakono, (*faatasi ma se tasi o tama ua maliu*) ma galulue ai seia oo mai i le taimi na maliu ai.

O ia o se tasi o aiga faavae o le Ekalesia. O le uluai failautusi a le aulotu, o le faipese, o le ta okeni, o le failauga foi i le va i fafo ma le Ekalesia, le Pulega ma le Matagaluega. Ae paga lea, ua le nofoia le nofoa o Tavita, ina ua valaauina o ia e lona Matai.

O Fainuulelei, e mai le alalafaga o Solosolo ma Moataa. Na soifua mai o ia i le aso 10 Aperila 1949, ae na faamanavaina e le Atua ana feau i le aso 27 Fepuari 2018, ina ua feagai ma se gasegase faafuasei (heart attack). Na faaipopo atu ia Soonalote Saunimaa o Papa Sataua i le aso 27 Iulai 1974 i Ueligitone, ma fananau mai ai o la alo e toa 4, (2 tama, 2 teine) ma fanau a fanau e toa 7. O lona soifua auauna i le galuega, e faamuamua lana Ekalesia, ae faamulimuli lona aiga. O se Tama, e le lagona se leo,

ae leotele ana faatinoga ma ana galuega. E filemu ma agamalu ona uiga, e tusaafia toe agamalie, ae tumu i le faaaloalo. E faaaloalo i tagata uma, aua e tutusa tagata uma ia te ia, e faaaloalo tele i lona faletua, aemaise le faifeau.

Matauina lona le popole pe fefe i le galuega, aua o se aulotu to'a gaogao. E le popole le toaitiiti o le au galulue, ae popole ina nei le faataunuuina lona valaauina, e atia'e le galuega. E mafai ona ou faapea, o se auauna, e aoga tele mo le galuega a le Alii.

E onosai, e faamalosi'au ana saunoaga, toe loto tele. O Fainuulelei, e leiloa tautala i le upu 'leai.' E ioe a ia i mea uma (He always says yes), aua e augofie lona finagalo. E faigofie ona manatu. E logomalie ana fautuaga. Na te faafaigofie mea faigata. Na te faamama foi mea mamafa. Na te faamalie ana saunoaga, ae afifi mai i lona faalototele i le galuega. E tausi faifeau ma fiafia e faitaulaga, aemaise lona fiafia i mea e fai, ma soo se faamoemoe e tautua ai lona Matai.

O Fainuulelei, o le uluai usufono tiakono a lenei aulotu i faalagamaea a le Ekalesia i Malua ia Me 2008.

O ona toe sauniga-le lotu faale-aiga (family service) sa faia lea i le 6 i le afiafi o le Aso Sa 4 Mati i le malumalu o St. James Presbyterian, ina ua maea ona auai lona sa, (tinomaliu) i le saunigalotu a lana lava Ekalesia, sa faia i le St Chads Church i le taeao o lea lava Aso Sa.

Sa ou taitaia le family service ma saunia le upu faamafanafana. O le Susuga ia Lauafia Taula, (AOG) safaitauina Afioga Paia a le Atua, a'o le Susuga ia Mulipola Misikei-Taitai o le Ekalesia Metotisi Koneferenisi NiuSila, sa saunia talosaga.

Matagofie molimau o lea afiafi, sa feagai ma alo ma fanau, ae maise aiga na lua, o uofoi ma e masani, o lenei tiakono tamalii.

O le Aso Gafua 5 Mati i le 10am, na faataunuuina ai lona toe sauniga. O le Susuga i le Toeaina o le Pulega Ueligitone i Matu-A'ufaga Faafia sa taitai i le sauniga. Sa ou faaulufaleina lona sa i totonu o le malumalu. O le failautusi o le Pulega- Meki Lauvi na feagai ma tatalo, a'o le upu faamafanafana, na feagai ma le Susuga ia Elekana Mose Tuialii. Sa molimau Michael Asi, e fai ma sui o le fanau i uiga alofa ma uiga tusaafia ma le finafinau o lo latou tama. Sa faaopopo foi le Afioga ia Leuluaiasi Asi e fai ma sui o le aiga. O le faletua ia Soonalote, na ia liliua lea taeao faanoanoa, i le malie ma le felanulanua'i o lana molimau, i le la mafutaga ma le tama o le aiga, I ona uiga le gaoia ma le tofilemu, loto alofa., ma le ola tauivi, ona ou faaiuina lea o molimau, i lona soifua faale-agaga, o lana auaunaga, ma lona le fefe e faatino le galuega.

Mae'a le sauniga, ona molimoli atu lea o lona sa i le Awanui Cemetery. Na oufaaiuina lona toe sauniga i lona oliolisaga e faavavau, ma faamavae atu ai i le pese 'Talofa uso e, tofaina oe...Tofa, tofa, tofa...'

'.....Amuia lea auauna, o loo valaau mai, ae o loo faapea ona fai.....' Faamaise le Agaga o le Atua i le tina ia Soonalote ma le fanau, faapea aiga ma le Ekalesia e pele ia te ia .

Faafetai Milo. (FS)

EFKS New Plymouth-Taranaki

O le matagofie e pepelo lea,  
o le mea faatauvaa le lalalei;  
a o le fafine ua mata'u i le  
Alii, e viia lava o ia  
*Faataoto 31:30.*

# O E UA FAI'ILAGI LE FOLAUGA

## Vaegaau Fulumu'a Te'o 21 Aokuso 1940-22 Aokuso 2017

O le faletua o le A'oa'o Fesoasoani i Falefa, Anoamaa. Na soifua Vaegaau i le aso 21 Aokuso 1940. Ua faamanava e le Atua ana fe'au i le aso 22 Aokuso 2017.

Na faa-Ekalesia i le 1957 e tusa ma faamaumauga a le Api o le Galuega. Na faaipopo ia Te'o Faainu Faamita'i o Laulii i le 25 Me 1965. Na avea i la'ua ma tiakono i le 1969, a o le tausaga 1971 na avea ai i laua ma A'oa'o Fesoasoani ina ua manuia le su'ega a le tama o le aiga. E 41 tausaga na galulue ai i le tofi A'oa'o Fesoasoani ina ua valaau le Atua i le tama o le aiga i le aso 7 o Novema 2012.

O Vaega'au o le toe ulutaia o le aufaigaluega a'oa'o ma tiakono na matou osi feagaiga ia Tesema 29 1977, seia valaau mai iai lona Matai.

Na malii le tama o le aiga ia Novema 2012 ona faaauu lea e ia lo la matafale e oo ina malii nei. O se matafale ausage aua na o ia ma si ona alo tama'ita'i e faigaluega i le malo, ae malos ma le pa'u i se mea e tasi.

Ou te oo mai iinei o faiaoga Aso Sa o ia seia oo ina gasegase le tama o le aiga i nai tausaga e le'i mamao atu, ona nofo lea e vaai le tama.

O Vaegaau o le faiaoga faauuina a le malo i A'oga Tulagalua seia oo ina ritaea i le 1985. O le sui faavae o le autalavou ina ua faavaeina i le 1967 seia oo ina malii nei. Tele tausaga o avea ma failautusi, sa avea foi ma teutupe a le Autalavou.

O le sui faamaoni o le Aufaipese mai lava i lo'u faato'a oo mai i Falefa nei seia oo ina gasegase ma le mafai ona toe lava mai i tapuaiga i Aso Sa. O le failautusi

faamoemoeina o le Mafutaga a Tina ua silia i le tolusefulu tausaga. E faatuatuaina e le to'alua o le faifeau ma le Mafutaga i mea lava tau mafutaga. O se tina lotoa ma le taulamua i mea uma, galue lelei faamalosi ma faamaoni i ona tiute faale-Ekalesia. O se tina to'aga i soo se sauniga ma soo se mea fai a le Ekalesia, tauaofiaga faapulega matagaluega aemaise faatasiga a le Mafutaga Aoa o Tina o le EFKS i Fono Tele i Malua. O se tina e le fefe, e le palaai e fai mea lelei ma fai mea sili mo le Galuega a le Atua. E le popole pe a faitioina o ia e le aufaitio ma le aufaavaivai, e faia lava e ia le mea na te iloa e lelei ai se faamoemoe.

E alofa i le faifeau ma lona toalua, e faaloalo ma tasi faifeau. Ou te faaigoa lava lenei tina o le toa o le Galuega i ona tiute faatua o le Ekalesia a Iesu, aua e leai se vaega o le Ekalesia e le'i auauna ai. Pei ona ou molimau atu e 17 tausaga o le soifua ae fai ma Ekalesia, tautua i le tofi tiakono, 41 tausaga o fai ma faletua o le A'oa'o Fesoasoani; sui o le Autalavou mai le 1967 seia valaau mai iai lona Matai; aufaipese i le olaga faalelotu atoa. Faia'oga Aso Sa toetoe o le olaga faalelotu atoa. Failautusi o le Mafutaga a Tina i le silia i le 30 tausaga, seia valaau mai lona Matai.

Fai mai le tusitala o le tusi o Failauga: 'Afa'i foi e pa'u se lauu i le itu i toga poo le itu i matu, o le mea e pa'u iai e iai pea ia.' E faapea le vaai i le soifua o le tina nei, o le soifua na pa'u i le Atua a o itiiti lava, ua malii lava o taatia ai pea. Amuia Vaegaau e maua mai e lona Matai a o loo faapea ona fai.

"Auauna lelei ma le faamaoni, ulufale maia i le fiafia o lou Alii."

O ona toe sauniga na faia i le aso muamua o Setema 2017 i le

malumalu EFKS i Falefa. Susuga Peni Meaalofa FS, nafaaulufaleina lona sa; Susuga Vaigalo Maua FS na saunia talosaga, Susuga Samuelu Samuelu FS na fofogaina le Tusi Paia ma le Upu Faamafanafana mo le aiga ma le fanau.. O a'u sa taitai ma molimau i lona soifua tautua - faafetai Vaegaau, malo le tau, malo le faatoatoa malo loto tele, ia fai ma viiga o le Atua lou soifua aoga.

O a'u foi sa faaiiina ona toe sauniga i lona oliolisaga tumau - manuia lau malaga.

Ona faatofa ai lea ia te ia i le pese "Talofa uso e, tofaina oe!"

Faatauulua Maualaivao FT.  
EFKS Falefa.

## Lagā Semuā Mose 8 Aperila 1959-16 Mati 2017

O le alii tiakono o le aulotu i Falefa, Anoamaa. Na soifua mai i le aso 8 Aperila 1959, ae faamanava e le Atua ana feau i le aso 16 Mati 2017.

O ona matua o Semua Penu Mose (tama) mai Lepa, ma Afia (tina) mai Vaiala. Na faaipopo ia Salevao 'Oti Leutele o Falefa i le aso 24 Aperila 1991. Na faa-Ekalesiaina ia Mati 2000, ae avea ma tiakono ia Juni 2014.

Sa le'i matua maopopo lelei le soifua o le uso i taimi ia, 'ai ona o le tausoosoga o le malos ma le aafia gofie i ta'a'iga a tupulaga. Peitai ua faasolo ina tagata matua ma ua lagona foi lona valaauina e ala i le tofi tiakono, o iina na vaaia ai se suiga tele i lona soifua.

Ua vaaia le fiafia i tapuaiga i Aso Sa ma soo se sauniga, ua iloga foi le faamaopopo ma le auai i mea e fai aemaise o galuega a le Ekalesia. O si o la aiga o se aiga tau atia'e faato'a amata ona faigaluega isi o le fanau ae sa iloga

*faaauu itulau e sosoo ai*

# O E UA FAI'ILAGI LE FOLAUGA

## Laga Semua Mose

8 Aperila 1959-16 Mati 2017

*mai le itulau e 14*

le taumafai e o faatasi ma le aumalolosi i le faatinoina o le faatuatua faitino. O Laga foi o se tama sa taumafai e ta'ita'i ma faasino tonu lana fanau ma lona aiga i ala o le Alii.

Ua vaaia lava le matagofie o le

tulai mai o le tiakono ma lona soifua ofoina mo lona Matai, ae paga lea ua po'ia o ia i se gasegase faigata ua oo ai lava ina maluu.

Faafetai Laga mo le mafutaga, malo galue, malo tautua - manuia lau malaga.

O ona toe sauniga sa ou ta'ita'i, molimau ma saunia le upu faamafanafana mo le tina, fanau ma aiga.

O Alataua Sootaga FS sa faaulufaleina le sa o le tiakono, o le Epikopo sa saunia talosaga ma ou toe ta'ita'ia ona toe sauniga i lona oliolisaga tumau.

Ona faamavae atu lea i le pese a le Au Kerisiano - Talofa uso e, tofaina oe.

Faatauoloo Maualaivao FT  
EFKS Falefa

## Falefa Poasa

### Leuta Mulivai

29 Aperila 1959 - 21 Iuni 2017

O le alii tiakono o le Ekalessia i Falefa Anoamaa. Na soifua mai i le aso 29 Aperila 1959 ae valaau mai lona Matai i le aso 21 Iuni 2017. O ona matua o Leuta Falefa Mulivai (tama) mai Falefa ma Atalia Lago (tina) mai Faleapuna. Na faaiipoipo ia Saliga Ofisa o Falefa lava, e toatolu o la alo.

Na faa-ekalesiaina i la'ua ia Tesema 2006 ae avea ma tiakono ia Fepuari 2008. O Falefa a o talavou sa fiafia tele e auai i le Aufaipese ma le Aulavou, ae ina ua avea ma tiakono ua le toe fiafia

i ia vaega o le Galuega.

O se tama e talenia i le faifaiva. aua o le atina'e lea a lona aiga i tausaga e tele a o soifua foi matua. O lana taleni lea sa mau galuega ai i isi aiga sa fai o latou vaafagota, ina ua faaletonu le atina'e a lona aiga.

E iai foi lona iloa faakamuta sa aoga foi lea e fesoasoani ai i galuega a le aulotu faapea le faifeau. O se aiga ausage lo la aiga, ae sa taumafai lava e fai mea uma e tautua ai le Ekalesia a Keriso. O se tama e filemu ona uiga, e le saunoa soo ae tele lava i le 'ata'ata. E fiafia tele i tapua'iga i Aso Sa ma tauaofiaga faale-Pulega ma le Matagaluega.

Tele foi le aoga o lenei auauna i

feau a le faifeau lava ia. Faafetai Falefa mo le mafutaga aemaise lou soifua taumfai mo le Atua ma lona malo. Amuia foi oe e maua mai oe e lou Matai a o loo faapea ona e fai.

O ona toe sauniga na faia i le malumalu i le itula e 2pm, aso muamua o Iulai 2017. O le susuga ia Alataua Sootaga na saunia le upu faamafanafana mo le tina ma aiga, o le Susuga a Taula Mama (AOG) na saunia talosaga, o au sa molimau ma ta'ita'i ma faaiu ona toe sauniga i lona oliolisaga tumau. Faamaise le Agaga o le Atua i le tina ma aiga ma ia manuia lau malaga.

Faatauoloo Maualaivao FT.  
EFKS Falefa

## Va'aelua Talaolevavau Malo Va'aelua

8 Iulai 1940 – 20 Tesema 2017

'Auā o lo'u ola ua ia Keriso lea;  
a o lo'u oti, o lo'u manuia lea'  
Filipi 1.21

O Va'aelua Talaolevavau Malo Va'aelua, e valaauina e lona Matai o galue i lo la tofi Tiakono ma le Faletua i le EFKS Grey Lynn, Matagaluega Aukilani Niu Sila. E 77 tausaga ma masina e 4 le matua o lona soifua. O ona tua'a o

Va'aelua Fati'au Vagavao Sitagata Po'e mai le afioaga o Sataoa, ma Saolelagi Tuleiseafi Tonumaie'a mai Lalomalava. Na faaiipoipo atu ia Faafetai Ivara, o se alo sa faasino i le Faifeau ua fai i lagi le folauga, Seula Konelio Ivara Falaniko ma le Faletua ia Vaega'au Ivara.

Sa amata lo la tofi Tiakono i le EFKS Sagafili, Matagaluega Aana, ma faaauuain ai le EFKS Grey Lynn seia oo ina faamanavaina ana galuega. A o le'i malaga mai i Niu Sila, sa avea foi o ia o se leoleo i le Malo o Samoa. O Talaolevavau sa galue i vaega uma o le Aulotu, aemaise le

Aulavou ma le Aufaipese. A o fai o ia ma Failautusi o le Aulotu, o se tamā na ia lē tuua se mea e silafia e lelei ma manuia ai le galuega. I le tausaga 2000, na aafia ai i le gasegase o le stroke, a e sa finau pea ma alofagia e le Atua. O se tasi o ana faamalosi tino ina ua gasegase, o le toe faaauuleina o 'ie toga teu a le Aulotu. Soo se taimi e asiasi atu iai, o loo galue mai lava e faatino lana galuega. E fiafia auā e faaoga ai lona taimi manū o maua lona malosi. E ui ina lē atoatoa le malosi, ae atoatoa le faatuatua e faatino ai lana  
*faaauau itulau e 16*

# O E UA FAI'LAGI LE FOLAUGA




**Vaegaau Fulumu'a Te'o**



**Laga Semua Mose**



**Falefa Poasa  
Leuta Mulivai**




**Va'aelua  
Talaolevavau Malo  
Va'aelua**

*mai le itulau e 15*

auaunaga. E amata ona ma galulue i Grey Lynn i le 2012 na vaaia lona fiafia pea e foai mo le Alii e ala i ana atina'e, o ana faiga Taulaga, ma le tausiga o le faifeau ma le aiga. E ui ina gasegase, ae toa filemu lava lona soifua ona o le maopopo ma le lagolago malosi a lana fanau. O se tamā e leotele pe a saunoa auā e leotele ana galuega. Ia viia le suafa o le Alii i le soifua o lana auauna ia Va'aelua Talaolevavau Malo Va'aelua.

O ona toe sauniga na faia lava i le malumalu o le EFKS i Grey Lynn. O lona Sauniga Faaleaiga sa



**Fainu'ulelei Tulatoa  
Aoe'e Mulivai Asi.**

faia i le 6 i le afiafi o le Aso Lulu, 27 o Tesema, 2017. O le Susuga ia Vagatai Va'aelua (FS) sa taitai ma saunia le upu faamafanafana. O le Susuga ia Aiono Fa'aea (AF) na saunia talosaga, a o le Susuga ia Taliaoa Sanerivi (AF) na faitauina le Tusi Paia. O Auaifepese a le EFKS Grey Lynn ma Western Springs na saunia pese o le Sauniga. O lona Sauniga Faamavae sa faia i le 10 i le taeao o le Aso Faraile, 29 o Tesema, 2017. O le Susuga Fiatepa Fa'ae'e (FT) na taitaiina le sauniga. O le Susuga Togafiti Tuaoimaalii (FS) na faaulufaleina lona sa, o le

Susuga Fetuliaina Pama (FS) na saunia talosaga, o le Susuga Fuata'i Misi'aita (FS) na faitauina le Tusi Paia, ma le Susuga Iosefa Rimoni (FS) na saunia le upu faamafanafana. Na molimau le faletua ia Faafetai Va'aelua i le la mafutaga ma Talaolevavau onafsaunoa lea o Tofilau Faamanuia Va'aelua e fai ma sui o le fanau. Na molimau Lupematasila Fa'amanu Ivava ma Tauanuu Sitagata Tapu e fai ma sui o aiga. Na molimau foi le Afioga i le Minisita o le Malo Samoa, Gatoloai Ama Gidlow, ona faaiu lea i la'u molimau i lona soifua faaleagaga. O pese o le sauniga na saunia e Auaifepese a le EFKS Grey Lynn ma Western Springs. Na ou taitaiina le sauniga i lona oliolisaga tumau i le Manukau Memorial Gardens i Papatoetoe, ma faatofa atu ai i le tamā i le Pese faamavae a le Au Kerisiano, 'Talofa uso e, tofaina oe, ua sau le itupo e malolo.' Fetalai le Alii, 'le auauna lelei e, ma le faamaoni, ulufale mai ia i le fiafia o lou alii.'

Peniamina Leota  
EFKS Grey Lynn,  
Aukilani Niu Sila